

iii) Relevan

Pembangunan alat *Genuine Inspection Device* (GID) merupakan salah satu pembaharuan terkini teknologi dalam pemeriksaan dokumen perjalanan, visa, pas dan permit. Kepesatan industri pelancongan di Malaysia menjadikan Malaysia sebagai salah satu antara negara yang menjana ekonomi berasaskan pelancongan. Kemasukan pelancongan yang ramai turut member banyak kesan positif dan negatif, selain turut mengundang ancaman dari anasir yang tidak baik yang akan merosakkan keamanan negara. Kesan negatif yang akan mengganggu kedaulatan dan keamanan negara dari industri pelancongan adalah kita akan dapat lihat lambakan Pendatang Asing Tanpa Izin (PATI) yang datang salah menggunakan pas kemasukan sebagai pelancong tetapi digunakan untuk bekerja di Malaysia. Di antara negara utama yang mempunyai masalah dalam penyalahgunaan dokumen perjalanan adalah seperti Indonesia, Vietnam, India dan Myanmar.

Hampir setiap hari kita dapat lihat di media massa atau media elektronik mengenai kes sindiket pemalsuan dokumen perjalanan yang dibangkitkan. Isu ini semakin hari semakin bertambah peningkatan kes seperti cendawan yang tumbuh selepas hujan. Isu ini menjadi semakin serius apabila ada pelawat asing yang menggunakan dokumen perjalanan palsu berjaya bolos masuk ke negara kita apabila kurangnya peralatan apabila pegawai di kaunter pemeriksaan ingin melakukan pemeriksaan yang lebih teliti ke atas dokumen perjalanan tersebut. Isu pemalsuan dokumen perjalanan walaupun dilihat remeh oleh sesetengah pihak tapi ia boleh mendatangkan impak yang besar kepada kesejahteraan dan keamanan negara walaupun hanya satu dokumen perjalanan palsu berjaya bolos ke dalam negara kita.

Oleh itu, Jabatan Imigresen Malaysia dibawah Kementerian Dalam Negeri bertanggungjawab sepenuhnya dalam isu lambakan Pendatang Asing Tanpa Izin ini. Beberapa cara dan pembaharuan telah dilakukan untuk mengatasi masalah ini. Sebagai barisan hadapan yang menerima kemasukan pelancong yang ramai ke dalam negara, pemeriksaan yang teliti terhadap orang dan dokumen perjalanan yang dibawa haruslah sentiasa mengikut prosedur yang sepatutnya. Pembangunan GID dilihat sebagai salah satu cara dalam pemeriksaan ketulenan dokumen perjalanan. Pemilihan projek ini sebagai salah satu penambakan dalam inovasi sedia ada menyokong visi dan misi Jabatan Imigresen Malaysia. Visi Jabatan Imigresen Malaysia iaitu "Peneraju Perkhidmatan Imigresen" berkait dengan alat GID dimana mampu dijadikan sebagai sebuah penanda aras kepada perkhidmatan Imigresen di negara lain.

Selain itu, misi Jabatan Imigresen Malaysia iaitu "Meningkatkan system penyampaian perkhidmatan selaras dengan pembangunan ekonomi dan keselamatan negara dengan penuh integriti" dapat diterapkan ke dalam pelaksanaan projek GID dalam meningkatkan kecekapan pegawai semasa menjalankan tugas pemeriksaan dokumen perjalanan seterusnya dapat membanteras sindiket pemalsuan dokumen

perjalanan palsu dari masuk ke Malaysia. Di antara fungsi utama dalam Jabatan Imigresen Malaysia adalah mengawal selia pergerakan keluar masuk orang di pintu-pintu masuk yang diwartakan. Oleh itu, pelaksanaan projek GID ini akan lebih menekankan ketelitian dalam pemeriksaan pergerakan keluar masuk pelawat

Alat GID ini dilihat turut mempunyai nilai kesamaan terhadap dasar kualiti Jabatan Imigresen Malaysia iaitu menyediakan perkhidmatan Imigresen yang cemerlang bagi memenuhi keperluan pelanggannya. Pengurusan Imigresen hendaklah berasaskan MS ISO 9001:2008. Dalam menyediakan perkhidmatan yang lebih cemerlang kepada pelanggan, pihak Jabatan Imigresen Malaysia sentiasa mencari idea dan inisiatif untuk memastikan pelanggan yang berurusan dengan pihak jabatan mendapat layanan yang baik dan urusan yang perlu diselesaikan berjalan dengan lancar. Seiring dengan itu, pihak Imigresen tidak akan mengabaikan aspek keselamatan dalam pemeriksaan dokumen. Seperti yang dinyatakan oleh pemegang taruh Jabatan Imigresen Malaysia atau *stakeholder* iaitu Menteri di Kementerian Dalam Negeri iaitu Tan Sri Muhyiddin bin Yassin dalam kenyataannya baru-baru ini iaitu "Hasrat saya ialah memastikan keselamatan dan keamanan negara sentiasa terjamin selain melaksanakan tugas yang diamanahkan Perdana Menteri Tun Dr Mahathir bin Mohamad. Kita mahu aspek keselamatan menjadi sebahagian daripada perkara yang ditekankan kepada rakyat". Beliau berucap dalam Astro Awani bertarikh 22 Mei 2018 baru-baru ini.

Di dalam agenda nasional iaitu pelan strategik Kementerian Dalam Negeri (KDN) Teras ke tiga dibawah keselamatan sempadan, tiga matlamat utama yang perlu direalisasikan dari teras ini adalah menguatkuasakan undang-undang imigresen dengan tegas, mengukuhkan keselamatan sempadan dan juga membanteras jenayah rentas sempadan. Pergerakan keluar masuk di pintu sempadan secara tidak sah melalui darat, laut dan udara merupakan satu ancaman kepada keselamatan negara dan kesejahteraan rakyat. Secara langsung, tidak dinafikan kemasukan warga asing secara sah mendatangkan faedah kepada negara. Namun begitu, perkara yang amat membimbangkan apabila kemasukan warga asing secara tidak sah adalah bukan sahaja penyeludupan manusia di sempadan negara tetapi juga melibatkan aktiviti penyeludupan barang-barang haram termasuk senjata api dan dadah.

Kebanjiran pendatang asing tanpa izin (PATI) yang memasuki negara kita secara tidak sah mengundang keresahan apabila mereka bukan hanya datang untuk bekerja tetapi turut melakukan kes-kes jenayah yang serius yang hampir mengugat keamanan dan kesejahteraan negara. Selaras dengan itu, Ketua Pengarah Imigresen Malaysia, Datuk Seri Mustafar Ali dalam ucapan beliau telah berkata 'Jabatan Imigresen Malaysia telah Berjaya menahan 19 000 PATI pelbagai warganegara setakat bulan Mei 2018. Tindakan tanpa kompromi ini dilakukan bagi memastikan kedaulatan dan keselamatan negara tidak diceroboh. Kawalan keselamatan di semua pintu masuk negara, baik darat, udara mahupun laut akan terus diperketat tanpa kompromi.'

Oleh yang demikian, pelbagai cara dilakukan oleh Jabatan Imigresen Malaysia untuk memastikan keselamatan negara berada di tahap yang optimum dalam memastikan keselamatan negara dapat diperketatkan tanpa kompromi. Penciptaan *Genuine Inspection Device* (GID) merupakan salah satu inisiatif baru Jabatan Imigresen Malaysia dalam memastikan tahap keselamatan negara dapat diperketatkan di semua pintu masuk negara samaada darat, laut dan udara. Penggunaan GID yang bukan hanya mampu membantu Jabatan Imigresen tetapi turut mampu digunakan di jabatan dan agensi lain yang memerlukan alat untuk mengesan dokumen perjalanan palsu.

Penciptaan GID yang dilihat sejajar dengan perkembangan teknologi dilihat mampu mengesan dokumen palsu dengan lebih tepat daripada pemeriksaan yang hanya menggunakan mata kasar sahaja. Alat pemeriksaan ini mempunyai lima fungsi utama yang sentiasa digunakan semasa membuat pengesanan ketulenan sesebuah dokumen keselamatan samada passport, pas, visa, permit dan dokumen keselamatan yang lain. *Genuine Inspection Device* atau GID adalah alat pemeriksaan yang bersaiz kecil dan ringan serta boleh dicas semula ini adalah sangat praktikal untuk digunakan oleh pegawai yang bertugas di kaunter pemeriksaan imigresen semasa membuat pemeriksaan ketulenan sesebuah dokumen.

Selain itu, GID ini juga mempunyai beg kalis air yang dapat melindungi alat ini daripada terkena air. Buku manual dan rujukan turut disediakan bagi memudahkan para pegawai untuk mengetahui cara penggunaan GID dan membuat perbandingan antara dokumen keselamatan yang palsu dan yang tulen. Kewujudan alat ini sangat membantu jabatan dan juga boleh digunakan oleh jabatan dan agensi kerajaan yang lain serta syarikat swasta yang memerlukan alat pengesanan ketulenan ini dalam kerja seharian seperti kedai runcit, bank, pengurup wang, Agensi Penguatkuasa Maritim dan banyak lagi.